



REPUBLIKA E SHQIPËRISË

**AUTORITETI I KOMUNIKIMEVE ELEKTRONIKE DHE POSTARE
KËSHILLI DREJTUES**

V E N D I M

Nr. 23, date 30.3.2018

Për

“Përcaktimin e sipërmarrësit Telekom Albania Sh.a., sipërmarrës me Fuqi të Ndjeshme në Treg për terminimin e thirrjeve në rrjetin publik Telekom Albania drejt numrave gjeografikë fiks¹ dhe vendosjen e masave rregulluese”

Këshilli Drejtues (KD) i Autoritetit të Komunikimeve Elektronike dhe Postare (AKEP), i përbërë nga:

1. Z. Ilir	Zela	Kryetar
2. Z. Alban	Karapici	Anëtar
3. Zj. Anila	Denaj	Anëtar
4. Zj. Ketrin	Topçiu	Anëtar
5. Zj. Klarina	Allushi	Anëtar

dhe sekretare Znj. Ina Nuellari, në mbledhjen e datës 30.03.2018, sipas procedurës së përcaktuar në ligjin nr. 9918 datë 19.05.2008 “Për Komunikimet Elektronike në Republikën e Shqipërisë”, i ndryshuar, dhe Rregullore e Brendshme për “Funksionimin e Këshillit Drejtues të Autoritetit të Komunikimeve Elektronike dhe Postare” miratuar me Vendimin Nr.7, datë 16.02.2017 të Këshillit Drejtues të AKEP, shqyrtoi çështjen me objekt:

“Përcaktimin e sipërmarrësit Telekom Albania Sh.a., me Fuqi të Ndjeshme në Treg dhe vendosjen e masave rregulluese për shërbimet me shumicë të terminimit dhe tranzitimit të thirrjeve në rrjetet telefonike publike fikse”

mori ne shqyrtim dokumentacionin e paraqitur nga Drejtoria e Rregullimit Ekonomik dhe Statistikave përbëhet nga:

- i. Projekt vendimi;
- ii. Relacioni Shoqërues i projekt vendimit;
- iii. Dokumenti: “Analizë e tregut të telefonisë fikse: tregjet me shumicë të terminimit dhe tranzitimit të thirrjeve në rrjetet telefonike publike fikse – Dokument Përfundimtar”;
- iv. Komentet e palëve të interesuara për dokumentin.

¹ Shërbimi telefonik GSM Fiks i tregtuar si Telekom Albania Fiks

BAZA LIGJORE:

- 1) Shkronja ç) e nenit 8, neni 31 e vijues, pika 1 e nenit 114 dhe pika 1 e nenit 115 te ligjit nr. 9918, datë 19. 05. 2008 “Për Komunikimet Elektronike në Republikën e Shqipërisë” i ndryshuar (*ligji nr. 9918*);
- 2) Ligji nr. 8485, datë 12.05.1999 “Kodi i Procedurave Administrative” (*ligji nr. 8485*), i ndryshuar;
- 3) Ligjin nr. 8480, datë 27. 05.1999 “Për funksionimin e organeve kolegjiale të administratës shtetërore dhe enteve publike;
- 4) “Rregullore për analizen e tregut”, miratuar me vendimin nr. 747, datë 17.07.2009, të Keshillit Drejtues të AKEP, ndryshuar me VKD nr.2342, datë 31.07.2013 (*Rregullorja*).
- 5) Vendimin Nr.28, date 27.12.2017, “Miratimin për këshillim publik të Dokumentit: *Analizë e tregut të telefonisë fikse: tregjet me shumicë të terminimit dhe tranzitimit të thirrjeve në rrjetet telefonike publike fikse– Këshillim Publik*”.

KËSHILLI DREJTUES

Nga shqyrtimi i dokumentacionit të paraqitur si dhe duke iu referuar bazës ligjore të sipërcituar

V E R E N:

1. Dokumenti “*Analizë e tregut të telefonisë fikse: tregjet me shumicë të terminimit dhe tranzitimit të thirrjeve në rrjetet telefonike publike fikse – Dokument Përfundimtar*” reflekton punën e Drejtorisë së rregullimit Ekonomik dhe Statistikave, si dhe komentet dhe vërejtjet e bëra gjatë mbledhjes.
2. Dokumenti “*Analizë e tregut të telefonisë fikse: tregjet me shumicë të terminimit dhe tranzitimit të thirrjeve në rrjetet telefonike publike fikse – Dokument Përfundimtar*”,
 - a. është përgatitur pas kryerjes së këshillimit publik të zhvilluar më 29.12.2017 – 28.02.2018, dhe përmban komentet e palëve të interesuara dhe qëndrimin e AKEP për komentet (Aneks 1, i dokumentit) në përputhje me nenin 35 të Ligjit 9918;
 - b. përbën një dokument të rëndësishëm rregullator në bazë së të cilit merren vendimet për FNT në tregjet e analizuar dhe masat rregulluese respektive, të cilat janë shumë të rëndësishme për zhvillimet rregullatore dhe tregun e komunikimeve elektronike në Shqipëri;
 - c. nga pikpamja e rregullsisë, është në përputhje me procedurën e përcaktuar në ligjin nr.9918/2008 dhe Rregulloren për Analizën e tregut;
 - d. nga pikpamja e ligjshmërisë është në konformitet me përcaktimet ligjore të parashikuara për analizën e tregut në nenin 31 e në vijim të Kreut VI të Ligjit 9918, dhe Rregullores, përfshirë përkufizimin e detajuar të tregjeve përkatës dhe analizën e testit të tre kriterëve, kriteret e përcaktimit FNT, dhe detyrimet e parashikuara për FNT;

- e. ka marrë në konsideratë rekomandimet dhe direktivat e Komisionit Europian dhe praktikat më të mira rregullatore në vendet e Bashkimit Europian, parimet e ligjit të konkurrencës dhe kushtet aktuale të tregut Shqiptar celular;
- f. vendosja, ndryshimi, mbajtja dhe heqja e detyrimeve për FNT është në përputhje, me përcaktimet e nenit 36 e në vijim të Kreut VI të Ligjit 9918, me pikën 5 të nenit 3 të Rregullores dhe me objektivat rregullatore të AKEP, të përcaktuara në nenin 7 të ligjit 9918.

A T E H E R Ë:

Për sa më sipër, mbi bazën e vlerësimit të pozitës në tregjet përkatëse të sipërmarrësit Telekom Albania Sh.a., sipas Dokumentit “*Analizë e tregut të telefonisë fikse: tregjet me shumicë të terminimit dhe tranzitimit të thirrjeve në rrjetet telefonike publike fikse – Dokument Përfundimtar*”, në mbështetje të pikës 1 të nenit 114, pikës 1 të nenit 115 të ligjit nr. 9918, si dhe në zbatim të kompetencës ligjore të përcaktuar në shkronjën ç) të nenit 8 të ligjit nr. 9918, Këshilli Drejtues i AKEP,

V E N D O S I:

1. Bazuar në dokumentin “*Analizë e tregut të telefonisë fikse: tregjet me shumicë të terminimit dhe tranzitimit të thirrjeve në rrjetet telefonike publike fikse – Dokument Përfundimtar*”, miratuar me VKD Nr. 21, datë 30.03.2018, të përcaktojë sipërmarrësin Telekom Albania Sh.a., sipërmarrës me FNT në tregun përkatës të mëposhtëm:

1.1 Tregu me shumicë i terminimit të thirrjeve në rrjetin publik telefonik të Telekom Albania Sh.a. të ofruara nga vendndodhje fikse;

Zona gjeografike e tregut perkatëse me FNT është kombëtare apo territori i Republikës së Shqipërisë.

2. Sipërmarrësi Telekom Albania sh.a. i përcaktuar sipërmarrës me FNT, në tregjet e nivelit të shumicës është i detyruar të zbatojë detyrimet përkatëse si më poshtë, por pa u kufizuar:
 1. Detyrimi i Mosdiskriminimit (neni 39);
 2. Detyrimi i transparencës (Neni 40);
 3. Detyrimi për akses dhe interkoneksion dhe përdorimi i përbashkët i faciliteteve të rrjetit (Neni 42);
 4. Detyrimi për kontroll të tarifave dhe orientim në kosto (Neni 45);

3. Detyrimet e mësipërme në pikën 2, përfshijnë midis të tjerave:

3.1 Detyrimi i Mosdiskriminimit:

- Sipërmarrësi Telekom Albania Sh.a., të zbatojë kushte të njëjta, në rrethana të njëjta ndaj sipërmarrësve të tjerë, që ofrojnë shërbime ekuivalente, si dhe t’u ofrojë sipërmarrësve të tjerë shërbime dhe informacion në kushte të njëjta dhe me cilësi të njëjtë, sikundër ai i ofron për shërbimet e veta, për filialet ose partnerët e tij;

- Sipërmarrësi Telekom Albania Sh.a ndalohet të aplikojë tarifa të ndryshme të terminimit të thirrjeve hyrëse kombëtare në rrjetin e tij për operatorë të ndryshëm kombëtarë origjinues (fiks apo celular), në kushte dhe rrethana të njëjta.

3.2 Detyrimi i transparencës:

Detyrimi i transparencës përfshin publikimin nga sipërmarrësi të tarifës së terminimit në rrjetin e tij si dhe te adreses së pikes së interkoneksionit me këtë rrjet.

3.3 Detyrimi për akses dhe interkoneksion dhe përdorimi i përbashkët i faciliteteve të rrjetit:

Sipërmarrësi Telekom Albania Sh.a., për terminimin e thirrjeve në rrjetin Telekom Albania, duhet:

- a) *t'u ofrojë palëve të treta akses në elemente të veçanta të rrjetit dhe/ose faciliteteve, duke lejuar, ndërmjet të tjerash, zgjedhjen dhe/ose parazgjedhjen e bartësit dhe/ose ofertat e rishitjes së linjës së pajtimtarit;*
- b) *të mos anulojë aksesin në facilitetet, kur e ka dhënë atë;*
- c) *të negociojë me dëshirën e mirë dhe me mirëbesim me subjektet, që kërkojnë akses;*
- d) *të ofrojë akses të hapur në ndërfaqet teknike, protokollat ose teknologjitë e tjera të rëndësishme, të domosdoshme për ndërvëprimin e shërbimeve ose për shërbimet e rrjetit virtual;*
- e) *të ofrojë bashkëvendosje ose forma të tjera të përdorimit të përbashkët, përfshirë ndërtesat, tubacionet kabllore ose shtyllat, kullat;*
- f) *të krijojë kushtet e nevojshme për të siguruar ndërvëprimin e shërbimeve pikë fundore – pikë fundore, duke përfshirë facilitetet për shërbimet e rrjetit inteligjent;*
- g) *të ofrojë akses në sistemet mbështetëse funksionale ose sistemet e ngjashme informatike (softëare), të nevojshme, për të siguruar konkurrencë të ndershme në ofrimin e shërbimeve;*
- h) *të interkonektojë rrjetet ose facilitetet e rrjetit.*

Detyrimet e mësipërme, i referohen vetëm detyrimeve për mundësimin e terminimit të thirrjeve kombëtare drejt numrave gjeografikë fiks në rrjetin publik telefonik Telekom Albania, dhe janë të zbatueshme sipas mundësive/aftësive teknike dhe ekonomike të sipërmarrësit Telekom Albania Sh.a.

3.4 Detyrimi për kontroll të tarifave dhe orientim në kosto:

- (1) Tarifat e shërbimeve të terminimit të thirrjeve drejt numrave gjeografikë fiks në rrjetin publik telefonik Telekom Albania dhe shërbimeve të interkoneksionit të lidhura me këto shërbime janë objekt kontrolli dhe rregullimi nga AKEP;
- (2) Metoda e rregullimit të tarifave të shërbimeve në piken 1 me siper përcaktohen me vendim të vecante nga AKEP sipas përcaktimeve të nenit 57 e në vijim të Ligjit 9918.

- 4. Sipërmarrësi Telekom Albania Sh.a. ka detyrimin që të zbatojë detyrime dhe specifikime të tjera të përcaktuara nga AKEP, sipas nevojave të tregut, për statusin e FNT në tregjet përkatëse të përcaktuar me status me FNT.

5. Afati i vlefshmërisë së statusit me FNT në tregjet përkatëse për sipërmarrësin Telekom Albania Sh.a., është deri në nxjerrjen e një vendimi tjetër nga AKEP mbi bazën e analizës së tregut të kryer sipas nenit 34 të Ligjit 9918.
6. Dokumenti “Analizë e tregut të telefonisë fikse: tregjet me shumicë të terminimit dhe tranzitimit të thirrjeve në rrjetet telefonike publike fikse – Dokument Përfundimtar” i bashkëngjitet këtij vendimi si Aneks 1 dhe është pjesë e tij.
7. Vendimi nr.2620, date 08.10.2015 i Këshillit Drejtues të AKEP shfuqizohet.
8. Kundra këtij vendimi, mund të bëhet ankim në Këshillin Drejtues të AKEP, brenda 30 (tridhjetë) ditëve pas publikimit.
9. Ky Vendim të publikohet në faqen e internetit të AKEP: www.akep.al.

Ky Vendim hyn në fuqi në datën e miratimit të tij.

K R Y E T A R

Ilir ZELA

ANËTARË:

1. **Alban KARAPICI**
2. **Anila DENAJ**
3. **Ketrin TOPÇIU**
4. **Klarina ALLUSHI**